

15 JUN 1999

Abu Hassan-Dialog

SELANGOR ANJUR DIALOG BERSAMA PELAJAR UNTUK JELASKAN SITUASI SEMASA

SHAH ALAM, 15 Jun (Bernama) -- Kerajaan Selangor memulakan siri dialog bersama para pelajar termasuk mereka yang menuntut di institusi pendidikan tinggi awam dan swasta dan mereka yang melanjutkan pelajaran ke luar negeri.

Menteri Besar Datuk Seri Abu Hassan Omar berkata usaha itu adalah selari dengan gesaan Perdana Menteri Datuk Seri Dr Mahathir Mohamad bagi meningkatkan proses komunikasi antara pelajar dan kerajaan.

"Dialog itu pada asasnya bertujuan memberi penerangan dan menjadikan mereka memahami sepenuhnya situasi politik dan ekonomi di negara ini," katanya ketika merasmikan siri dialog yang pertama di sini hari ini.

Lebih daripada 700 pelajar dari Universiti Malaya (UM), Universiti Kebangsaan Malaysia (UKM), Institut Teknologi Mara (ITM) dan Kolej Islam Darul Ehsan hadir pada sesi dialog itu.

Abu Hassan berkata siri dialog itu juga selari dengan konsep "Budaya Murni dan Bersih" yang dimulakan oleh kerajaan negeri yang antara lain bertujuan mengetengahkan mengenai pentingnya semangat patriotisme dan tanggungjawab mereka kepada keluarga, masyarakat dan negara.

Pada sesi dialog itu Abu Hassan berkata pelajar juga akan didedahkan kepada buku yang ditulis oleh Dr Mahathir bertajuk "The Way Forward", "The Malay Dilema", "CEO Malaysia" dan "A New Deal For Asia" serta buku mengenai konsep "Budaya Murni dan Bersih", menerusi pameran bergerak.

Ketika bercakap kepada pemberita kemudian, beliau berkata pelajar di negara ini kebanyakannya hanya memberi fokus kepada mendapatkan sijil, diploma atau ijazah dan meninggalkan aspek-aspek lain terutama mengenai situasi semasa yang berlaku di negara ini.

Keadaan ini telah menyebabkan mereka mudah dipengaruhi golongan yang mempunyai motif tertentu, katanya dan menambah kata bahawa atas alasan itulah mereka dikenalpasti sebagai sasaran utama dialog itu.

Abu Hassan juga menggesa pelajar bersikap adil kepada ibu bapa masing-masing yang telah berkorban demi memberi pendidikan serta negara yang menyediakan infrastruktur yang diperlukan bagi tujuan tersebut.

-- BERNAMA

KM LAT